



AMHT

Agencija za nadzor nad tržištem BiH
Агенција за надзор над тржиштем БиХ
Market Surveillance Agency of B&H

BILTEN

O NESIGURNIM PROIZVODIMA NA TRŽIŠTU BOSNE I HERCEGOVINE



- Nesigurni proizvodi
- Zaštita potrošača

Godina 3, broj 3, mart 2016. godine



IMPRESUM

Osnivač i izdavač

Agencija za nadzor nad tržištem
Bosne i Hercegovine

Za izdavača

direktor

mr.sc. Aleksandar Golijanin, dipl.ing.geol.

Glavni i odgovorni urednik

Mladen Batković, dipl. ing. maš.

Članovi redakcije

mr.sc. Dražan Primorac, dipl. ing. saob.

mr.sc. Samir Bekto, dipl. ing. maš.

Mičo Drljo, dipl. ing. maš.

Lidija Lovrić, dipl. ing. hem.

Danka Krajišnik, prof. eng. jezika

Edin Ćerimagić, dipl. ing. građ.

Dizajn

Agencija za nadzor nad tržištem
Bosne i Hercegovine

Tiraž

100 primjeraka

Bilten izlazi jednom godišnje

Prilikom preuzimanja podataka iz ovog
izdanja, obavezno navedite izvor!

PREDGOVOR	3
Proaktivni nadzor u 2015. godini	4
Bicikli za malu djecu	5
Stolice za vanjsku upotrebu	6
Skejtboardi	7
Koturaljke	8
Opasne imitacije	9
Dječije lutke	10
Električni tosteri	11
Prenosne kvarcne sobne grijalice	12
Električna kuhala za vodu	13
Električni uvijači i pegle za kosu	14
Električne lančane pile	15
Motorne lančane pile	16
Plutajuća pomagala za učenje plivanja	17
Zaštitne rukavice za mehaničke rizike	18
Zaštitna / sigurnosna obuća	19
Zatvorene ekspanzione posude sa membranom	20
Bitumenske trake za hidroizolaciju	21
Keramičke pločice	22
Reaktivni nadzor u 2015. godini	23
Sumarni rezultati nadzora u 2015. godini	24
Lista proizvoda sa ozbiljnim rizikom	26

**Poštovane čitateljke i čitaoci,**

Čast nam je i zadovoljstvo predstaviti 5. izdanje Biltena o nesigurnim proizvodima na tržištu Bosne i Hercegovine. Za razliku od prethodnih izdanja, ovaj put smo odlučili da Bilten u potpunosti posvetimo samo vama – potrošačima.

Primjenom najboljih evropskih praksi nadzora nad tržištem nastojimo osigurati veći stepen sigurnosti proizvoda na tržištu Bosne i Hercegovine, a time i bolju zaštitu zdravlja potrošača. Zahvaljujući svemu tome, u saradnji sa inspektorima iz Federacije BiH, Republike Srpske i Brčko distrikta BiH u prethodnoj godini smo postigli zapažene rezultate. Na ovaj način težimo da se potrošači u Bosni i Hercegovini osjećaju jednako sigurno kao i evropski potrošači.

U ovom godišnjem izdanju smo sumirali rezultate nadzora iz 2015. godine. U njemu možete pronaći informacije o proizvodima sa ozbiljnim rizikom i savjete kako da prilikom kupovine razlikujete sigurne proizvode od proizvoda koji ne ispunjavaju zahtjeve za sigurnost.

Naš cilj je da cjelokupna javnost Bosne i Hercegovine bude u potpunosti informisana o stanju na tržištu sa aspekta sigurnosti neprehrambenih potrošačkih proizvoda. Stoga vas pozivamo da pratite i svako naredno izdanje Biltena, kao i ostale naše publikacije koje objavljujemo u elektronskoj i štampanoj formi.

Zapamtite: Informisan potrošač je zaštićen potrošač!



*Mladen Batković
Glavni urednik*



PROAKTIVNI NADZOR U 2015. GODINI

U 2015. godini Agencija za nadzor nad tržištem BiH, u saradnji sa inspektoratima entiteta i Brčko distrikta BiH, realizovala je 18 projekata proaktivnog nadzora neprehrambenih potrošačkih proizvoda u skladu sa Godišnjim planom nadzora za 2015. godinu.

Cilj projekata nadzora je bio da se utvrdi da li kontrolisane grupe proizvoda, koje se stavljaju na tržište BiH, ispunjavaju sigurnosne zahtjeve iz propisa koji su na snazi u Bosni i Hercegovini. U okviru projekata su vršene administrativne i vizuelne kontrole, te laboratorijsko ispitivanje proizvoda.

PROIZVODI KONTROLISANI U OKVIRU PROAKTIVNOG NADZORA

Grupa proizvoda	Pravni osnov
1. Bicikli za malu djecu	Zakon o općoj sigurnosti proizvoda („Službeni glasnik BiH“, broj 102/09).
2. Stolice za vanjsku upotrebu	
3. Skejtbordi	
4. Koturaljke	
5. Opasne imitacije	
6. Dječije lutke	
7. Električni tosteri	Naredba o električnoj opremi namijenjenoj za upotrebu unutar određenih naponskih granica („Službeni glasnik BiH“, broj 98/09)
8. Prenosne kvarcne sobne grijalice	
9. Električna kuhala za vodu	
10. Električni uvijači i pegle za kosu	
11. Električne lančane pile	Naredba o sigurnosti mašina („Službeni glasnik BiH“, broj 04/10).
12. Motorne lančane pile	
13. Plutajuća pomagala za učenje plivanja	Naredba o ličnoj zaštitnoj opremi („Službeni glasnik BiH“, broj 75/10)
14. Zaštitne rukavice za mehaničke rizike	
15. Zaštitna / sigurnosna obuća	
16. Zatvorene ekspanzione posude sa membranom	Naredba o opremi pod pritiskom („Službeni glasnik BiH“, broj 52/11)
17. Bitumenske trake za hidroizolaciju	Zakon o građevinskim proizvodima u FBiH („Službene novine FBiH“, broj 78/09)
18. Keramičke pločice	Zakon o građevinskim proizvodima u RS („Službeni glasnik RS“ broj 5/12).

BICIKLI ZA MALU DJECU



Bicikli za malu djecu namijenjeni su za djecu težine do približno 30 kg. Ovi bicikli mogu imati maksimalnu visinu sjedišta u rasponu između 435 mm i 635 mm. Najčešći rizik kojem su izložena djeca prilikom vožnje bicikla je rizik od povrede usljed pada.

SAVJETI PRILIKOM KUPOVINE

Prilikom kupovine bicikla za malu djecu savjetujemo potrošače da obrate pažnju na sljedeće:

➤ **Da li se na proizvodu nalaze obavezne oznake/informacije?**

Na proizvodu se trebaju nalaziti sljedeće oznake / informacije:

- broj rama na vidljivom mjestu na biciklu,
- naziv proizvođača ili njegovog predstavnika,
- broj standarda BAS EN ISO 8098 ili ISO 8098.

➤ **Da li je uputstvo za upotrebu priloženo uz proizvod?**

Uputstvo za upotrebu mora biti priloženo uz svaki bicikl koji se prodaje i mora biti napisano na jednom od službenih jezika u BiH. Generalno, uputstvo mora sadržavati: informacije o predviđenoj namjeni bicikla sa upozorenjima o opasnostima od nepravilne upotrebe, informacije o pripremi za vožnju, upute za sigurno korištenje bicikla, informacije o ispravnom postupku montaže svih dijelova, informacije o podmazivanju dijelova bicikla, informacije o podešavanju određenih dijelova bicikla, te informacije o postavljanju, podešavanju i skidanju pomoćnih točkova.

➤ **Da li proizvod ima vidljivih sigurnosnih nedostataka?**

Bicikl mora imati najmanje dvije kočnice, jednu za prednji i jednu za zadnji točak. Bicikl mora imati zaštitnik oko lanca koji u potpunosti prekriva vanjsku stranu i rubove lanca, prednji i zadnji lančanik i unutrašnju stranu prednjeg lančanika. Dijelovi bicikla koji dolaze u kontakt sa rukama i nogama djeteta ne smiju biti oštri.



REZULTATI NADZORA BICIKLA ZA MALU DJECU

PRAVNI OSNOV

Da bi se bicikli za malu djecu mogli staviti na tržište Bosne i Hercegovine oni moraju biti sigurni u skladu sa **Zakonom o općoj sigurnosti proizvoda** („Službeni glasnik BiH“, broj 102/09).

Kako bi se utvrdilo da li bicikli ispunjavaju propisane sigurnosne zahtjeve izvršene su administrativne provjere uputstva za upotrebu i označavanja, vizuelne provjere određenih sigurnosnih svojstava, te laboratorijska ispitivanja 8 modela bicikla. Utvrđeno je da niti jedno od 8 ispitanih bicikla nije ispunjavalo propisane sigurnosne zahtjeve. Od tog broja, 7 modela bicikla, u količini od 48 komada, je povučeno sa tržišta dok je na jednom modelu bicikla, u količini od 12 komada, izvršeno otklanjanje neusklađenosti. Najčešće neusklađenosti odnosile su se na sljedeće: neispravne kočnice, nepotpunu zaštitu oko lanca, oštre ivice, nedovoljno osno rastojanje između zadnjeg točka i pomoćnih točkova.





STOLICE ZA VANJSKU UPOTREBU

Stolice za vanjsku upotrebu spadaju u vanjski namještaj i koriste se za kućnu i javnu upotrebu, te za kampovanje. Stolice moraju biti tako konstruisane da ne uzrokuju nikakve povrede za korisnika kad ih koristi u skladu sa predviđenom namjenom.

SAVJETI PRILIKOM KUPOVINE

Prilikom kupovine stolica za vanjsku upotrebu savjetujemo potrošače da obrate pažnju na sljedeće:

➤ **Da li je uputstvo za upotrebu priloženo uz proizvod?**

Uputstvo za upotrebu mora biti priloženo uz svaku stolicu za vanjsku upotrebu koja se nalazi u prodaji i mora biti napisano na jednom od jezika koji su u službenoj upotrebi u Bosni i Hercegovini.

Uputstvo mora sadržavati sljedeće informacije:

- na vrhu uputstva mora biti napisan tekst: "VAŽNO, SAČUVATI ZA BUDUĆU UPOTREBU - PROČITATI PAŽLJIVO",
- naziv i adresu proizvođača (proizvođač ili dobavljač),
- informacije o održavanju,
- informacije o predviđenoj namjeni stolice (kampovanje, kućna ili javna upotreba).

➤ **Da li proizvod ima vidljivih sigurnosnih nedostataka?**

Dijelovi stolice za vanjsku upotrebu koji dolaze u kontakt sa korisnikom tokom upotrebe trebaju biti zaobljeni i ne smiju imati oštre rubove. Noge stolice moraju biti zatvorene s donje strane.



REZULTATI NADZORA STOLICA ZA VANJSKU UPOTREBU

PRAVNI OSNOV

Da bi se stolice za vanjsku upotrebu mogle staviti na tržište Bosne i Hercegovine one moraju biti sigurne u skladu sa **Zakonom o općoj sigurnosti proizvoda** („Službeni glasnik BiH“, broj 102/09).

Kako bi se utvrdilo da li stolice ispunjavaju propisane sigurnosne zahtjeve izvršene su administrativne provjere uputstva za upotrebu, vizuelne provjere određenih sigurnosnih svojstava, te laboratorijska ispitivanja 9 stolica. Utvrđeno je da 8 od 9 ispitanih modela stolica za vanjsku upotrebu nije ispunjavalo sve propisane sigurnosne zahtjeve. Na 6 od 8 neusklađenih modela, u količini od 700 komada, je izvršeno usklađivanje sa sigurnosnim zahtjevima, dok su 2 modela, u količini od 310 komada, povučena sa tržišta i uništena, jer su predstavljala ozbiljan rizik za potrošače. Najčešće neusklađenosti su nestabilnost stolica i nepotpuna uputstva za upotrebu.



SKEJTBORDI



Skejtboardi spadaju u opremu za sport i rekreaciju i namijenjeni su za jednu osobu. Skejtboardi se dijele u dvije klase: klasa A - skejtboardi koji su namijenjeni za korisnike mase od 20 kg do 100 kg, i klasa B - skejtboardi koji su namijenjeni za korisnike mase od 20 kg do 50 kg. Najčešći rizik kojem su izloženi korisnici pri vožnji skejtboarda je rizik od povrede usljed pada.

SAVJETI PRILIKOM KUPOVINE

Prilikom kupovine skejtboarda savjetujemo potrošače da obrate pažnju na sljedeće:

➤ **Da li postoji upozorenje na proizvodu?**

Na skejtboardu mora da bude naveden sigurnosni kod: "Upozorenje - Vožnja skejtboardom može biti opasna".

➤ **Da li se na proizvodu nalaze obavezne oznake / informacije?**

Na proizvodu se trebaju nalaziti sljedeće oznake / informacije:

- oznaka standarda BAS EN 13613 ili EN 13613,
- naziv, trgovačka marka proizvođača ili drugi način identifikacije proizvođača ili maloprodaje,
- identifikacija proizvoda,
- informacije o maksimalnoj masi korisnika,
- preporuku o upotrebi zaštitne opreme.

➤ **Da li moraju biti priložene i druge informacije uz proizvod?**

Informacije koje navodi proizvođač moraju biti priložene uz svaki skejtboard koji se prodaje i iste moraju biti napisane na jednom od službenih jezika u BiH. Ove informacije moraju sadržavati, u formi teksta ili slike, informacije o konstrukciji skejtboarda, uputstvo za upotrebu, te upute za održavanje i servisiranje.

➤ **Da li proizvod ima vidljivih sigurnosnih nedostataka?**

Skejtboardi moraju imati gornju površinu od protukliznog materijala i iznad te površine ne smije biti nikakvih dijelova koji strše. Svi dijelovi skejtboarda koji dolaze u kontakt sa dijelovima tijela korisnika moraju biti zaobljeni i ne smiju imati oštre rubove.



REZULTATI NADZORA SKEJTBORDA

PRAVNI OSNOV

Da bi se skejtboardi mogli staviti na tržište Bosne i Hercegovine oni moraju biti sigurni u skladu sa **Zakonom o općoj sigurnosti proizvoda** („Službeni glasnik BiH“, broj 102/09).

Kako bi se utvrdilo da li skejtboardi ispunjavaju propisane sigurnosne zahtjeve izvršene su administrativne provjere označavanja i informacija koje navodi proizvođač, vizuelne provjere određenih sigurnosnih svojstava, te laboratorijska ispitivanja 5 uzoraka skejtboarda. Utvrđeno je da niti jedan od 5 ispitanih modela skejtboarda nije ispunjavao sve propisane sigurnosne zahtjeve. Svi ispitani modeli skejtboarda, u količini od 768 komada, povučeni su sa tržišta Bosne i Hercegovine jer su predstavljali ozbiljan rizik za korisnike. Na svim ispitanim skejtboardima došlo je do loma daske skejtboarda ili osovine točkova .





KOTURALJKE

Koturaljke spadaju u opremu za sport i rekreaciju. Koturaljke koje se najčešće danas koriste imaju sve točkove postavljene u jednoj liniji. Ove koturaljke se dijele u dvije klase: klasa A - koturaljke koje su namijenjene za korisnike mase od 20 kg do 100 kg, i klasa B - koturaljke koje su namijenjene za korisnike mase od 20 kg do 60 kg i dužine stopala do 260 mm. Najčešći rizik kojem su izloženi korisnici prilikom korištenja koturaljki je rizik od povrede usljed pada.

SAVJETI PRILIKOM KUPOVINE

Prilikom kupovine koturaljki savjetujemo potrošače da obrate pažnju na sljedeće:

➤ **Da li se na proizvodu nalaze obavezne oznake / informacije?**

Na proizvodu se trebaju nalaziti sljedeće oznake / informacije:

- oznaka standarda BAS EN 13843 ili EN 13843,
- naziv, trgovačka marka proizvođača, ili drugi način identifikacije proizvođača ili maloprodaje,
- identifikacija modela,
- informacije o maksimalnoj masi korisnika ili oznaka klase koturaljke (A ili B). Ako maksimalna masa koturaljki nije navedena na koturaljkama, ista mora biti navedena na pakovanju.



➤ **Da li moraju biti priložene i druge informacije uz proizvod?**

Informacije koje navodi proizvođač moraju biti priložene uz svaki par koturaljki koji se prodaje i iste moraju biti napisane na jednom od službenih jezika u BiH. Ove informacije moraju sadržavati, u formi teksta ili slike, informacije o konstrukciji koturaljki, uputstvo za upotrebu, te upute za održavanje i servisiranje.

➤ **Da li proizvod ima vidljivih sigurnosnih nedostataka?**

Svi dijelovi koturaljki koji dolaze u kontakt sa dijelovima tijela korisnika moraju biti zaobljeni i glatki kako ne bi uzrokovali povrede korisnika. Kopče na cipelama moraju biti čvrsto pričvršćene kako bi se izbjeglo slučajno otkopčavanje.

REZULTATI NADZORA KOTURALJKI

PRAVNI OSNOV

Da bi se koturaljke mogle staviti na tržište Bosne i Hercegovine one moraju biti sigurne u skladu sa **Zakonom o općoj sigurnosti proizvoda** („Službeni glasnik BiH“, broj 102/09).

Kao rezultat nadzora, utvrđeno je da niti jedan od 9 ispitanih modela koturaljki nije ispunjavao propisane sigurnosne zahtjeve. Od tog broja, 3 modela koturaljki, u količini od 21 komada, predstavljali su ozbiljan rizik za korisnike, te su povučena s tržišta. Na 3 modela koturaljki, u količini od 266 komada, izvršeno je otklanjanje neusklađenosti koje su se odnosile na nepotpunost informacija i oznaka koje navodi proizvođač. Na preostala 3 modela, u količini od 143 komada, poslovni subjekti nisu otklonili neusklađenosti i dobrovoljno su povukli koturaljke s tržišta. Najčešće neusklađenosti su se odnosile na sljedeće: nepotpune informacije i oznake, točkovi nisu napravljeni od protukliznog materijala, te oštre ivice.



OPASNE IMITACIJE



Opasna imitacija je opasan proizvod obmanjujućeg izgleda, koji podsjeća na prehrambeni proizvod, tako da postoji mogućnost da ga potrošači, posebno djeca, ne razlikuju od prehrambenog proizvoda i stave u usta, sisaju ili progutaju, što može predstavljati opasnost i izazvati npr. gušenje, trovanje, te perforaciju ili opstrukciju probavnog trakta.

OPASNE IMITACIJE NA TRŽIŠTU BiH

Opasne imitacije mogu se nalaziti na tržištu u vidu dekorativnih svijeća, plastičnih imitacija voća, povrća, kolača, gumica za brisanje, sapuna, kozmetike i drugih proizvoda. Poseban rizik za djecu predstavljaju proizvodi koji imaju oblik, izgled, boju i veličinu da ih djeca mogu smatrati hranom, staviti u usta, sisati ili progutati, što može dovesti do gušenja. Stoga skrećemo pažnju roditeljima da ovi proizvodi nisu igračke, te da ih ne treba davati djeci da se igraju sa njima.



Proizvodi na slikama su opasne imitacije pronađene na tržištu Bosne i Hercegovine u 2015. godini.



REZULTATI NADZORA OPASNIH IMITACIJA

PRAVNI OSNOV

U skladu sa članom 4. **Zakona o općoj sigurnosti proizvoda** („Službeni glasnik BiH“, broj 102/09) nije dopušteno proizvoditi, stavljati na tržište, uvoziti ili izvoziti opasne imitacije.

Tokom provedbe projekta izvršeno je 11 inspeksijskih kontrola. Ukupno je kontrolisano 11 različitih proizvoda imitacija hrane. Za 10 kontrolisanih proizvoda je utvrđeno da su opasni proizvodi, tj. da ih djeca zbog izgleda, oblika ili veličine mogu zamijeniti za prehrambeni proizvod. Također, proizvodi ili dijelovi proizvoda se uklapaju u cilindar za sitne dijelove, te ih djeca mogu progutati, što predstavlja rizik od gušenja. Kao rezultat provedenih aktivnosti nadzora, povučeno je sa tržišta 832 komada opasnih imitacija, te od tog broja uništeno 737 komada opasnih imitacija.



DJEČIJE LUTKE

Igračke su proizvodi isključivo ili neisključivo projektovani ili namijenjeni za igru djece do 14 godina starosti i ne bi trebali izazvati nikakvu opasnost za zdravlje i život njihovih korisnika. Oni bi trebali biti dizajnirani i proizvedeni na takav način da tokom njihovog korištenja ne uzrokuju nikakve zdravstvene opasnosti, uključujući opasnost od izlaganja hemijskim tvarima.

FTALATI U IGRAČKAMA

Ftalati su hemijske tvari koje se dodaju u plastične mase da bi se poboljšala njihova mekoća, savitljivost i rastezljivost. Nalaze se u mnogim proizvodima uključujući dječije igračke. Ftalati su vrlo mobilni i lako migriraju iz plastičnih proizvoda. U organizam se mogu unijeti gutanjem, udisanjem i preko kože, te narušiti zdravlje djece. Povezani su s raznim negativnim uticajima na zdravlje, uključujući hormonske abnormalnosti, urođene mane i reproduktivne probleme. Zabranjena je upotreba ftalata ¹DEHP, DBP, BBP u igračkama i proizvodima za djecu i ftalata ²DINP, DIDP i DNOP u igračkama i proizvodima za djecu koje djeca mogu staviti u usta u koncentracijama većim od 0,1% mase plastificiranog materijala.

Proizvodi na slikama su dječije lutke koje su povučene i uništene u 2015. godini zbog toga što su sadržavale ftalate u koncentracijama većim od 0,1% mase plastificiranog materijala.



REZULTATI NADZORA DJEČIJH LUTKI

PRAVNI OSNOV

Igračke koje se stavljaju na tržište Bosne i Hercegovine u pogledu sadržaja ftalata moraju zadovoljiti zahtjeve **Odluke o ograničavanju stavljanja na tržište igračaka i proizvoda za djecu koji sadrže ftalate** („Službeni glasnik BiH“, broj 04/10).

Tokom provedbe projekta s tržišta Bosne i Hercegovine je uzeto 14 uzoraka dječijih lutki različitih robnih marki za koje je izvršena laboratorijska analiza. Laboratorijskom analizom je utvrđeno da 10 ispitanih uzoraka sadrži ftalate u koncentraciji većoj od 0,1% mase plastificiranog materijala što nije u skladu sa odredbama Odluke o ograničenju stavljanja na tržište igračaka i proizvoda za djecu koji sadrže ftalate. Shodno tome, nadležne inspekcije entiteta i Brčko distrikta BiH su naložile mjere povlačenja sa tržišta, povrata od potrošača i uništavanja nesigurnih igračaka, te obavještanja potrošača. Sa tržišta Bosne i Hercegovine povučeno je i uništeno 6030 komada dječijih lutki.

¹DEHP: di-(2-etilheksil) ftalat; DBP: dibutil pftalat; BBP: benzil butil ftalat.

²DINP: diizanonil ftalat; DIDP: diizodecil ftalat; DNOP: di-n-oktil ftalat.

ELEKTRIČNI TOSTERI



Električni toster spada u male kućanske uređaje koji služe za grijanje (tostiranje) kriški hljeba, sendviča i sličnih namirnica.

SAVJETI PRILIKOM KUPOVINE

Prilikom kupovine električnih tostera savjetujemo potrošače da obrate pažnju na sljedeće:

➤ **Da li se na proizvodu nalaze obavezne informacije?**

Na proizvodu se trebaju nalaziti najmanje sljedeće oznake / informacije: Oznaka proizvođača ili njegove robne marke, oznaka modela / tipa uređaja, CE (C) znak usklađenosti, vrijednost naznačenog napona ili opsega napona u voltima (V), vrijednost snage uređaja (W), oznaka prirode napona (~) ili frekvencije uređaja (Hz) i oznaka klase zaštite.

➤ **Da li je uputstvo za upotrebu priloženo uz proizvod?**

Uputstvo za upotrebu mora biti priloženo uz proizvod i napisano na jednom od jezika koji su u službenoj upotrebi u Bosni i Hercegovini. Uputstvo mora sadržavati sve detalje potrebne za sigurnu instalaciju, korištenje i održavanje proizvoda.

➤ **Da li proizvod ima vidljivih sigurnosnih nedostataka?**

Na uređaju ne smiju biti dostupni dijelovi pod naponom niti smiju postojati dijelovi koji se mogu skinuti bez alata, a čijim skidanjem postaju dostupni dijelovi pod naponom. Uređaj ne smije proizvoditi visoke temperature u dijelovima koji su tokom upotrebe dostupni korisniku, uključujući tijelo uređaja kao i eventualne otvore i strujanja vazduha iz tih otvora. Grijači uređaja moraju biti odgovarajuće pričvršćeni i ne smije biti moguće ostvariti kontakt sa njima u toku obavljanja funkcije uređaja. Uređaj mora imati i odgovarajuću mehaničku čvrstoću i stabilnost tako da izdrži predvidljive uslove upotrebe.



REZULTATI NADZORA ELEKTRIČNIH TOSTERA

PRAVNI OSNOV

Električni tosteri spadaju u električnu opremu i prema **Naredbi o električnoj opremi namijenjenoj za upotrebu unutar određenih naponskih granica** („Službeni glasnik BiH”, broj 98/09) mogu se staviti na tržište samo ako ne ugrožavaju sigurnost ljudi, domaćih životinja i imovine.

U toku provedbe projekta obavljeno je ukupno 8 inspekcijskih kontrola u kojima je kontrolisano 7 različitih tipova električnih tostera. Inspektori su izvršili administrativnu i vizuelnu kontrolu proizvoda na tržištu BiH i na tom osnovu odabrali 7 uzoraka za laboratorijsko ispitivanje. Laboratorijskom analizom je utvrđeno da 3 uzorka ne ispunjavaju sigurnosne zahtjeve Naredbe o električnoj opremi namijenjenoj za upotrebu unutar određenih naponskih granica, te da za potrošače predstavljaju rizik od požara i povreda.

Procjenom rizika ustanovljeno je da 1 uzorak predstavlja ozbiljan rizik za potrošače, te su izrečene mjere povlačenja sa tržišta i povrata od potrošača navedenih proizvoda, uz obavezu informisanja potrošača o rizicima koje proizvodi predstavljaju po korisnike i načinu povrata opasnih proizvoda od korisnika.

Kod 2 tipa proizvoda su otklonjene neusklađenosti, a proizvodi vraćeni na tržište. Sa tržišta je povučeno i uništeno ukupno 6 komada električnih tostera, a izvršeno je usklađivanje 194 komada.



PRENOSNE KVARCNE SOBNE GRIJALICE

Prenosna kvarcna sobna grijalica je uređaj koji u domaćinstvu služi za grijanje prostora pomoću jednog ili više grijača koji električnu energiju pretvaraju u toplotnu energiju.



SAVJETI PRILIKOM KUPOVINE

Prilikom kupovine prenosnih kvarcnih sobnih grijalica savjetujemo potrošače da obrate pažnju na sljedeće:

➤ **Da li se na proizvodu nalaze obavezne informacije?**

Na proizvodu se trebaju nalaziti najmanje sljedeće oznake / informacije: oznaka proizvođača ili njegove robne marke, oznaka modela / tipa uređaja, CE (C) znak usklađenosti, vrijednost naznačenog napona ili opsega napona u voltima (V), vrijednost snage uređaja (W) ili vrijednost naznačene struje uređaja (A), oznaka prirode napona (~) ili frekvencije uređaja (Hz) i oznaka klase zaštite.

➤ **Da li je uputstvo za upotrebu priloženo uz proizvod?**

Uputstvo za upotrebu mora biti priloženo uz proizvod i napisano na jednom od jezika koji su u službenoj upotrebi u Bosni i Hercegovini. Uputstvo mora sadržavati sve detalje potrebne za sigurnu instalaciju, korištenje i održavanje proizvoda.

➤ **Da li proizvod ima vidljivih sigurnosnih nedostataka?**

Na grijalici ne smiju biti dostupni dijelovi pod naponom niti smiju postojati dijelovi koji se mogu skinuti bez alata, a čijim skidanjem postaju dostupni dijelovi pod naponom. Na grijalici ne smiju biti dostupni grijači, tj. mora postojati zaštitna rešetka koja sprječava kontakt sa grijačima uređaja i koja se ne može skinuti bez upotrebe dodatnog alata. Ova rešetka mora imati veličinu otvora takvu da nije moguće dodimuti prstima grijače uređaja kroz otvore rešetke. Uređaj mora imati i odgovarajuću mehaničku čvrstoću i stabilnost tako da izdrži predvidljive uslove upotrebe.

REZULTATI NADZORA KVARCNIH GRIJALICA

PRAVNI OSNOV

Prenosne kvarcne sobne grijalice spadaju u električnu opremu i prema **Naredbi o električnoj opremi namijenjenoj za upotrebu unutar određenih naponskih granica** („Službeni glasnik BiH”, broj 98/09) mogu se staviti na tržište samo ako ne ugrožavaju sigurnost ljudi, domaćih životinja i imovine.

U toku provedbe projekta obavljeno je ukupno 9 inspekcijskih kontrola u kojima je kontrolisano 5 različitih tipova prenosnih kvarcnih sobnih grijalica. Inspektori su izvršili administrativnu i vizuelnu kontrolu proizvoda na tržištu BiH i na tom osnovu odabrali 5 uzoraka za laboratorijsko ispitivanje. Laboratorijskom analizom je utvrđeno da ni jedan ispitani uzorak ne ispunjava sigurnosne zahtjeve Naredbe o električnoj opremi namijenjenoj za upotrebu unutar određenih naponskih granica, te da za potrošače predstavljaju rizik od požara i povreda.

Procjenom rizika je za 3 neusklađena proizvoda ustanovljeno da predstavljaju ozbiljan rizik za potrošače, te su izrečene mjere povlačenja sa tržišta, povrata od potrošača i uništenja navedenih proizvoda, uz obavezu informisanja potrošača o rizicima koje proizvodi predstavljaju po korisnike i načinu povrata nesigurnih proizvoda od korisnika.

Kod 1 tipa proizvoda su otklonjene neusklađenosti, a proizvodi vraćeni na tržište, dok je 1 tip proizvoda uvoznik dobrovoljno povukao sa tržišta.

Ukupno je sa tržišta povučeno 54, od čega je uništen 41 komad prenosnih kvarcnih sobnih grijalica.

ELEKTRIČNA KUHALA ZA VODU



Električno kuhalo za vodu je mali kućanski uređaj koji služi za grijanje vode koja se nakon toga koristi za pripravljanje toplih napitaka.

SAVJETI PRILIKOM KUPOVINE

Prilikom kupovine električnih kuhala za vodu savjetujemo potrošače da obrate pažnju na sljedeće:

➤ Da li se na proizvodu nalaze obavezne informacije?

Na proizvodu se trebaju nalaziti najmanje sljedeće oznake / informacije: oznaka proizvođača ili njegove robne marke, oznaka modela / tipa uređaja, CE (C) znak usklađenosti, vrijednost naznačenog napona ili opsega napona u voltima (V), vrijednost snage uređaja (W), oznaka prirode napona (~) ili frekvencije uređaja (Hz), oznaka kapaciteta posude u litrima (l) i oznaka klase zaštite.

➤ Da li je uputstvo za upotrebu priloženo uz proizvod?

Uputstvo za upotrebu mora biti priloženo uz proizvod i napisano na jednom od jezika koji su u službenoj upotrebi u Bosni i Hercegovini. Uputstvo mora sadržavati sve detalje potrebne za sigurnu instalaciju, korištenje i održavanje proizvoda.

➤ Da li proizvod ima vidljivih sigurnosnih nedostataka?

Na uređaju ne smiju biti dostupni dijelovi pod naponom niti smiju postojati dijelovi koji se mogu skinuti bez alata, a čijim skidanjem postaju dostupni dijelovi pod naponom. Poklopac uređaja mora biti pričvršćen na odgovarajući način tako da ne postoji mogućnost ispadanja poklopca prilikom sipanja vode iz uređaja (mehanizam zavrtnja ili pričvršćenja poklopca). Napojni kabl kuhala za vodu ne smije biti duži od 75 cm osim ako se radi o sferno uvijenom kablu. Uređaj mora imati i odgovarajuću mehaničku čvrstoću i stabilnost tako da izdrži predvidljive uslove upotrebe.



REZULTATI NADZORA KUHALA ZA VODU

PRAVNI OSNOV

Električna kuhala za vodu spadaju u električnu opremu i prema **Naredbi o električnoj opremi namijenjenoj za upotrebu unutar određenih naponskih granica** („Službeni glasnik BiH”, broj 98/09) mogu se staviti na tržište samo ako ne ugrožavaju sigurnost ljudi, domaćih životinja i imovine.

U toku provedbe projekta obavljeno je ukupno 10 inspeksijskih kontrola u kojima je kontrolisano 7 različitih tipova električnih kuhala za vodu.

Inspektori su izvršili administrativnu i vizuelnu kontrolu proizvoda na tržištu BiH i na tom osnovu odabrali 7 uzoraka za laboratorijsko ispitivanje. Laboratorijskom analizom je utvrđeno da 3 uzorka ne ispunjavaju sigurnosne zahtjeve Naredbe o električnoj opremi namijenjenoj za upotrebu unutar određenih naponskih granica, te da za potrošače predstavljaju rizik od strujnog udara i požara.

Za sve neusklađene proizvode nadležni inspeksijski organi Federacije BiH, Republike Srpske i Brčko distrikta BiH su naložili mjere povlačenja s tržišta i uništavanja proizvoda, te obavještanja potrošača o rizicima i načinu povrata spornih proizvoda.

Ukupno je sa tržišta povučeno i uništeno 106 komada električnih kuhala za vodu.



UVIJAČI I PEGLE ZA KOSU

Električni uvijači i pegle za kosu su termički uređaji koji služe za stilizaciju kose. Najvažniji element ovih uređaja je električni grijač koji služi za zagrijavanje metalnog ili keramičkog dijela koji je namijenjen za uvijanje ili ravnanje kose. Najčešći rizici kojima su izloženi korisnici ovih uređaja su strujni udar, opekotine i požar.

SAVJETI PRILIKOM KUPOVINE

Prilikom kupovine električnih uvijača i pegli za kosu savjetujemo potrošače da obrate pažnju na sljedeće:

➤ **Da li postoji upozorenje na proizvodu?**



Ovo je oznaka upozorenja koja korisnika informiše da uređaj nije predviđen za upotrebu u kadama ili tuš kabinama. Takođe, u izuzetnim situacijama moguće je da umjesto ovog znaka

stoji upozorenje: **Ne koristite ovaj uređaj u blizini vode!**

➤ **Da li se na proizvodu nalaze obavezne informacije?**

Na proizvodu se moraju nalaziti sljedeće oznake: naziv ili zaštitni znak proizvođača, oznaka modela / tipa uređaja, vrijednost napona ili opsega napona u voltima (V), vrijednost snage uređaja u vatima (W), oznaka prirode napona (~) ili frekvencije uređaja u hercima (Hz) i oznaka klase zaštite.

➤ **Da li je uputstvo za upotrebu priloženo uz proizvod?**

Uputstvo za upotrebu mora biti priloženo uz proizvod i napisano na jednom od jezika koji su u službenoj upotrebi u Bosni i Hercegovini.



REZULTATI NADZORA ELEKTRIČNIH UVIJAČA I PEGLI ZA KOSU

PRAVNI OSNOV

Električni uvijači i pegle za kosu su uređaji koji se prema **Naredbi o električnoj opremi namijenjenoj za upotrebu unutar određenih naponskih granica** („Službeni glasnik BiH”, broj 98/09) mogu staviti na tržište Bosne i Hercegovine ili u upotrebu samo ako ne ugrožavaju zdravlje i sigurnost korisnika.

Tokom realizacije projekta izvršeno je 8 inspekcijских kontrola, u kojima su inspektori izvršili administrativnu i vizuelnu kontrolu proizvoda na tržištu i uzeli 7 uzoraka za laboratorijsko ispitivanje. Laboratorijskom analizom je utvrđeno da 3 uzorka ne ispunjavaju sigurnosne zahtjeve Naredbe o električnoj opremi namijenjenoj za upotrebu unutar određenih naponskih granica. Pri tome 1 uzorak za potrošače predstavlja rizik od požara i povreda, a kod ostala 2 uzorka su ustanovljene administrativne neusklađenosti.

Poslovni subjekat je dobrovoljno izvršio usklađivanje 1 modela pegle za kosu (29 komada). Druga 2 neusklađena modela su po nalogu inspekcijских organa povučena sa tržišta (24 komada).

ELEKTRIČNE LANČANE PILE



Ručna električna lančana pila je mašina za rezanje drveta koja u svojoj konstrukciji sadrži ručke, električni motor i rezni elemenat, a konstruisana je tako da se pridržava sa dvije ruke. Ovo je jedna od najopasnijih vrsta mašina, sa visokim rezidualnim rizikom, koja može da nanese vrlo ozbiljne, a često i smrtonosne povrede.



SAVJETI PRILIKOM KUPOVINE

Prilikom kupovine električnih lančanih pila savjetujemo potrošače da obrate pažnju na sljedeće:

➤ **Da li na električnoj lančanoj pili postoje propisane oznake?**

Svaka mašina mora biti označena jasno i neizbrisivo sa minimalno: CE (C) znakom usklađenosti, nazivom (ili zaštitnim znakom) i adresom proizvođača (ovlaštenog zastupnika), oznakom modela, serije ili tipa proizvoda, godinom proizvodnje, serijskim brojem ako postoji, naznačenim naponom ili opsegom napona u voltima (V), simbolom prirode napona (~ ili a.c.) ili nazivnom frekvencijom (Hz), nazivnom snagom u Watima (W) ili nazivnom strujom u Amperima (A), oznakom klase II konstrukcije (za lančane pile klase II), oznakom IP broja stepena zaštite od prodora vlage i oznakom za smjer rotacije lanca lančane pile.

➤ **Da li na električnoj lančanoj pili postoje obavezna upozorenja?**

Na mašini moraju biti upozorenja/piktogrami: "Radi smanjenja rizika od povreda, korisnik mora pročitati uputstvo za upotrebu", "Koristi zaštitu za oči", "Koristi zaštitu za sluh / uši", "Ne izlagati kiši" i "Odmah izvuci utikač iz napajanja ako je strujni kabl oštećen ili presječen".

➤ **Da li je uputstvo za upotrebu priloženo uz svaku mašinu?**

Uputstvo za upotrebu mora biti priloženo uz svaki proizvod i napisano na jednom od jezika koji su u službenoj upotrebi u Bosni i Hercegovini.

➤ **Da li proizvod ima vidljivih sigurnosnih nedostataka?**

Električna lančana pila treba biti tako zatvorena da se omogući odgovarajuća zaštita od slučajnog kontakta sa dijelovima pod naponom, a izvlačenje, uvlačenje ili uvrtnje kabela ne smije biti moguće. Dostupni dijelovi ne smiju imati oštre ivice, neravnine ili vrhove da bi mogli izazvati povrede. Lančana pila treba imati štitnik / futrolu za mač lanca pile i najmanje dvije ručke sa dužinom hvatajućeg dijela sa najmanje 100 mm.



REZULTATI NADZORA ELEKTRIČNIH LANČANIH PILA

PRAVNI OSNOV

Električne lančane pile se mogu staviti na tržište Bosne i Hercegovine ili u upotrebu samo ako ne ugrožavaju zdravlje i sigurnost korisnika, odnosno ako ispunjavaju odredbe **Naredbe o sigurnosti mašina** („Službeni glasnik BiH”, broj 04/10) .

U toku provedbe projekta obavljeno je ukupno 9 inspekcijskih kontrola u kojima je kontrolisano 6 različitih tipova ručnih električnih lančanih pila. Inspektori su izvršili administrativnu i vizuelnu kontrolu proizvoda na tržištu BiH i na osnovu rezultata odabrali 5 uzoraka za laboratorijsko ispitivanje. Laboratorijskim ispitivanjem utvrđeno je da 3 kontrolisana tipa proizvoda ne ispunjavaju sigurnosne zahtjeve Naredbe o sigurnosti mašina, te da za potrošače mogu predstavljati rizik od povreda. Najčešći nedostaci otkriveni prilikom ispitivanja bili su da: mašina nije propisno označena, uputstvo za upotrebu i sigurnosno uputstvo nisu propisno napisani, izjava o usklađenosti mašine nije priložena uz svaki proizvod i uputstvo za upotrebu nije bilo prevedeno na jedan od službenih jezika u BiH. Jedan model proizvoda je kontrolisan samo administrativno i vizuelno.

Prema rezultatima inspekcijskih kontrola ovih mašina, pronađena su 123 neusklađena proizvoda, od čega je sa odredbama propisanim Naredbom o sigurnosti mašina usklađeno svih 123 proizvoda.



MOTORNE LANČANE PILE

Ručna prenosiva motorna lančana pila je mašina za rezanje drveta koja u svojoj konstrukciji sadrži integrisane ručke, motor sa unutrašnjim sagorijevanjem i rezni element, a konstruisana je tako da se pridržava sa dvije ruke. Ovo je jedna od najopasnijih vrsta mašina, sa visokim rezidualnim rizikom, koja može da nanese vrlo ozbiljne, a često i smrtonosne povrede.



SAVJETI PRILIKOM KUPOVINE

Prilikom kupovine motornih lančanih pila savjetujemo potrošače da obrate pažnju na sljedeće:

➤ **Da li na motornoj lančanoj pili postoje propisane oznake?**

Svaka mašina mora biti označena jasno i neizbrisivo sa minimalno: CE (C) znakom usklađenosti, nazivom (ili zaštitnim znakom) i adresom proizvođača (ovlaštenog zastupnika); oznakom modela; serije ili tipa proizvoda; godinom proizvodnje; serijskim brojem ako postoji; identifikacijom i načinom rada sa komandama za uređaj za zaustavljanje rada motora, kočnicu lanca, ručnu kontrolu podmazivanja, kontrolu regulatora dovoda goriva (čok), glavni prekidač i prekidač za grijanje ručke ako postoji; identifikacijom podešavanja karburatora i ulja i identifikacijom otvora i poklopaca rezervoara za gorivo i ulje.



➤ **Da li na motornoj lančanoj pili postoje obavezna upozorenja?**

Na mašini moraju biti upozorenja / piktogrami: „UPOZORENJE: POGLEDAJ UPUTSTVO ZA UPOTREBU”, „Koristi zaštitu za oči”, „Koristi zaštitu za sluh / uši” i „Koristi zaštitu za glavu”.

➤ **Da li je uputstvo za upotrebu priloženo uz svaku mašinu?**

Uputstvo za upotrebu mora biti priloženo uz svaki proizvod i napisano na jednom od jezika koji su u službenoj upotrebi u Bosni i Hercegovini.

➤ **Da li proizvod ima vidljivih sigurnosnih nedostataka?**

Motorna pila mora imati ručke za obje ruke. Štitnik prednje ručke mora biti u blizini prednje ručke, kako bi zaštitio prste i ruku korisnika, a štitnik zadnje ručke mora biti takav da se pruža dužinom desne strane dna ispod zadnje ručke, kako bi zaštitio ruku korisnika od kontakta sa polomljenim lancem.

REZULTATI NADZORA MOTORNIH LANČANIH PILA

PRAVNI OSNOV

Motorne prenosive lančane pile se mogu staviti na tržište Bosne i Hercegovine ili u upotrebu samo ako ne ugrožavaju zdravlje i sigurnost korisnika, odnosno ako ispunjavaju odredbe **Naredbe o sigurnosti mašina** („Službeni glasnik BiH”, broj 04/10).

U toku provedbe projekta obavljeno je ukupno 10 inspekcijskih kontrola u kojima je kontrolisano 6 različitih tipova ručnih motornih lančanih pila. Inspektori su izvršili administrativnu i vizuelnu kontrolu proizvoda na tržištu BiH i na osnovu rezultata odabrali 5 uzoraka za laboratorijsko ispitivanje. Jedan model proizvoda je kontrolisan samo administrativno i vizuelno. Prema rezultatima ispitivanja, utvrđeno je da 5 kontrolisanih tipova proizvoda ne ispunjavaju sigurnosne zahtjeve Naredbe o sigurnosti mašina, a utvrđene su najčešće neusklađenosti: mašina nije propisno označena, uputstvo za upotrebu i sigurnosno uputstvo nisu kompletni ili nisu prevedeni na jedan od službenih jezika u BiH, izjava o usklađenosti mašine nije propisno napisana ili nije priložena uz svaki proizvod i mašina nije funkcionalno-tehnički kompletna kako je propisano.

Poslovni subjekti su dobrovoljno ili po nalogu inspekcijskih organa izvršili usklađivanje 2 tipa (100 komada) neusklađenih ručnih motornih lančanih pila sa odredbama propisanim Naredbom o sigurnosti mašina. Za 2 tipa (27 komada) neusklađenih proizvoda je izvršeno povlačenje sa tržišta i povrat proizvođaču, a kod 1 tipa (5 komada) neusklađenih proizvoda je izvršeno uništavanje.

PLUTAJUĆA POMAGALA ZA UČENJE PLIVANJA



Plutajuća pomagala, koja se nose, spadaju u ličnu zaštitnu opremu namijenjenu da se odjene, sigurno pričvrsti za tijelo i koja ima sposobnost plutanja ili se može napuhati. Najčešći rizik kojem su izloženi korisnici plutajućih pomagala za učenje plivanja je rizik od utapanja.

SAVJETI PRILIKOM KUPOVINE

Prilikom kupovine plutajućih pomagala savjetujemo potrošače da obrate pažnju na sljedeće:

➤ Da li postoje upozorenja na proizvodu?

Upozorenja na proizvodu moraju se sastojati od riječi „UPOZORENJE“ (ili „PAŽNJA“) i pratećeg teksta: NE ŠTITI OD UTAPANJA, UVIJEK DO KRAJA NAPUŠITE SVE VAZDUŠNE KOMORE, UPOTREBLJAVATI SAMO POD STALNIM NADZOROM I NOSITI NA GORNJEM DIJELU RUKE (samo za kolute oko ruke).

➤ Da li se na proizvodu nalaze obavezne informacije?

Na proizvodu se trebaju nalaziti sljedeće oznake / informacije: dozvoljena masa korisnika jednaka opsegu veličina i / ili opsegu starosti korisnika; oznaka standarda BAS EN 13138-1:2010 ili EN 13138-1:2008; oznaka tipa proizvoda i trgovačko ime, model ili kod; ime ili zaštitni znak proizvođača, uvoznika ili distributera. Na pakovanju ili proizvodu (ako je providno pakovanje) treba se nalaziti naljepnica sa specifičnim podacima o plutajućem pomagalu (tabela sa klasom plutajućeg pomagala, predviđena težina korisnika i upozorenje: ne štiti od utapanja - upotrebljavati samo pod stalnim nadzorom).

➤ Da li je uputstvo za upotrebu priloženo uz proizvod?

Uputstvo za upotrebu mora biti priloženo uz proizvod i napisano na jednom od jezika koji su u službenoj upotrebi u Bosni i Hercegovini.

➤ Da li proizvod ima vidljivih sigurnosnih nedostataka?

Plutajuća pomagala na napuhavanje moraju imati minimalno dvije odvojene vazdušne komore i na svakoj vazdušnoj komori mora biti nepovratni ventil. Na svakom nepovratnom ventilu mora biti čep koji je povezan sa tijelom ventila.



REZULTATI NADZORA PLUTAJUĆIH POMAGALA

PRAVNI OSNOV

Plutajuća pomagala koja se nose spadaju u II kategoriju lične zaštitne opreme i prema **Naredbi o ličnoj zaštitnoj opremi** („Službeni glasnik BiH“, broj 75/10) mogu se staviti na tržište Bosne i Hercegovine ili u upotrebu samo ako ne ugrožavaju zdravlje i sigurnost korisnika.

Tokom provedbe projekta izvršeno je 11 inspekcijskih kontrola koje su se zasnivale na administrativnoj provjeri dokumentacije, vizuelnoj provjeri proizvoda i uzimanju uzoraka za laboratorijska ispitivanja. Ukupno je kontrolisano 7 različitih modela plutajućih pomagala. Od ukupnog broja kontrolisanih proizvoda samo je 1 model plutajućeg pomagala bio usklađen sa Naredbom o ličnoj zaštitnoj opremi. Kod 6 modela plutajućih pomagala utvrđene su najčešće sljedeće neusklađenosti:

- Sigurnosni nepovratni ventili ne funkcionišu.
- Nemaju obaveznog upozorenja, pratećih oznaka i obaveznih obavijesti na proizvodu.
- Obavezne oznake i upozorenja nisu unutar 100 mm od ventila.
- Nemaju uputstva za upotrebu ili popratnog lista uz proizvod.
- Na pakovanjima proizvoda nedostaje tabela sa upozorenjem i specifičnim informacijama o proizvodu.

Poslovni subjekt je uskladio 1 model neusklađenog plutajućeg pomagala u količini od 662 komada sa odredbama propisanim Naredbom o ličnoj zaštitnoj opremi. Također, poslovni subjekti su povukli sa tržišta 5 modela plutajućih pomagala u količini od 287 komada.



ZAŠTITNE RUKAVICE ZA MEHANIČKE RIZIKE

Zaštitne rukavice za mehaničke rizike su namijenjene za zaštitu šaka ili dijela šaka na način da smanjuju rizik od povreda izazvanih habanjem, rezanjem sječivom, kidanjem i probijanjem. Pored rizika od povreda najčešći rizik kojem su izloženi korisnici zaštitnih rukavica za mehaničke rizike je hemijski rizik zbog nedozvoljenog sadržaja Cr(VI) u materijalu (koži) od kojeg su napravljene rukavice.



SAVJETI PRILIKOM KUPOVINE

Prilikom kupovine zaštitnih rukavica savjetujemo potrošače da obrate pažnju na sljedeće:

➤ **Da li se na proizvodu nalaze obavezne oznake / informacije?**

Na proizvodu se trebaju nalaziti sljedeće oznake / informacije: naziv, trgovački znak ili drugi način (brend) za identifikaciju proizvođača ili njegovog ovlaštenog zastupnika; oznaka modela zaštitne rukavice (komercijalno ime ili kod koji dozvoljava korisniku jasnu identifikaciju proizvoda); veličina zaštitne rukavice; te u slučaju da zaštitne rukavice kategorije II ili III ispunjavaju zahtjeve jednog ili više standarda, moraju biti označene piktogramom(ima) koji je u skladu sa primijenjenim standardom(ima). Uz piktogram mora biti navedena oznaka primijenjenog standarda i nivoi zaštite. Ukoliko je rukavica kategorije I usklađena samo sa standardom BAS EN 420 ne mora imati piktogram.



Zaštitne rukavice za mehaničke rizike su rukavice označene standardom BAS EN 388 i piktogramom za zaštitu od mehaničkih rizika. Uz piktogram i oznaku standarda kod zaštitnih rukavica za mehaničke rizike mora se nalaziti četverocifreni broj koji označava nivo zaštite npr. 3124, gdje je 3 - nivo otpornosti na habanje, 1 - nivo otpornosti na rezanje sječivom, 2 - nivo otpornosti na kidanje i 4 - nivo otpornosti na probijanje. Veći broj označava veći nivo zaštite.

➤ **Da li je uputstvo za upotrebu priloženo uz proizvod?**

Uputstvo za upotrebu, u obliku priloženog uputstva uz proizvod ili informacija na pakovanju, mora biti napisano na jednom od jezika u službenoj upotrebi u Bosni i Hercegovini, te sadržavati minimalno pojašnjenje oznaka kojima su označene rukavice.

REZULTATI NADZORA ZAŠTITNIH RUKAVICA

PRAVNI OSNOV

Zaštitne rukavice za zaštitu od mehaničkih rizika spadaju u II kategoriju lične zaštitne opreme i prema **Naredbi o ličnoj zaštitnoj opremi** („Službeni glasnik BiH”, broj 75/10) mogu se staviti na tržište Bosne i Hercegovine ili u upotrebu samo ako ne ugrožavaju zdravlje i sigurnost korisnika.

Tokom provedbe projekta izvršeno je 11 inspeksijskih kontrola koje su se zasnivale na administrativnoj provjeri dokumentacije, označavanja proizvoda i uputstva, te laboratorijskog ispitivanja uzoraka. Ukupno je kontrolisano 9 modela zaštitnih rukavica za mehaničke rizike. Od ukupnog broja kontrolisanih proizvoda samo 1 model zaštitnih rukavica je bio usklađen sa Naredbom o ličnoj zaštitnoj opremi. Kod 8 modela u količini od 5.436 komada zaštitnih rukavica utvrđene su najčešće sljedeće neusklađenosti:

- Ne pružaju zaštitu od habanja u skladu sa oznakom nivoa zaštite.
- Ne pružaju zaštitu od probijanja u skladu sa oznakom nivoa zaštite.
- Nemaju obaveznih oznaka i obavijesti na proizvodu.
- Nemaju obaveznog uputstva ili popratnog lista uz proizvod.

Poslovni subjekti su dobrovoljno ili po nalogu inspeksijskih organa izvršili usklađivanje 4 modela (4.639 komada) neusklađenih zaštitnih rukavica s odredbama propisanim Naredbom o ličnoj zaštitnoj opremi. Također, poslovni subjekti su dobrovoljno povukli sa tržišta 4 modela u količini od 797 komada, od čega su uništili 106 komada.

ZAŠTITNA / SIGURNOSNA OBUĆA



Zaštitna / sigurnosna obuća je namijenjena za zaštitu nogu na način da smanjuje rizik od povreda izazvanih udarom, probijanjem, klizanjem itd. Pored rizika od povreda najčešći rizik kojem su izloženi korisnici zaštitne / sigurnosne obuće je hemijski rizik zbog nedozvoljenog sadržaja Cr(VI) u materijalu (koži) od kojeg je napravljena obuća.



SAVJETI PRILIKOM KUPOVINE

Prilikom kupovine zaštitne / sigurnosne obuće savjetujemo potrošače da obrate pažnju na sljedeće:

➤ Da li se na proizvodu nalaze obavezne oznake / informacije?

Na proizvodu se trebaju nalaziti sljedeće oznake / informacije: veličina obuće; identifikacijska oznaka proizvođača; proizvođačka oznaka tipa obuće; godina i, najmanje, kvartal proizvodnje obuće; oznaka standarda tj. BAS EN ISO 20345 ili BAS EN ISO 20346; te simbol / simboli za otpornost na klizanje (SRA, SRB ili SRC) ili za ostale vrste zaštite (P, C, A, I, HI, itd.), koji odgovaraju predviđenoj zaštiti ili, gdje je primjenjivo, odgovarajućoj kategoriji (za sigurnosnu obuću: SB, S1 do S5, za zaštitnu obuću PB, P1 do P5).

➤ Da li je uputstvo za upotrebu priloženo uz proizvod?

Uputstvo za upotrebu mora biti priloženo uz proizvod i napisano na jednom od jezika koji su u službenoj upotrebi u Bosni i Hercegovini, te sadržavati minimalno: pojašnjenje oznaka kojima je obuća označena; primjenu; ograničenja upotrebe; instrukcije za skladištenje, održavanje i čišćenje; te krajnji rok upotrebe ili period zastarijevanja obuće.

➤ Da li proizvod ima vidljivih sigurnosnih nedostataka?

- Pritiskom u prednjem dijelu obuće, iznad prstiju, provjerite postojanje zaštitne kapice.
- Vrstom materijala ili hrapavošću đona obuće proizvođač treba omogućiti otpornost na klizanje.
- Donji uložak treba da bude fiksiran na način da se ne može izvaditi bez oštećenja obuće, odnosno u nedostatku istog, treba biti trajno ugrađen gornji uložak.

REZULTATI NADZORA ZAŠTITNE / SIGURNOSNE OBUĆE

PRAVNI OSNOV

Zaštitna / sigurnosna obuća može spadati u II ili III kategoriju lične zaštitne opreme i prema **Naredbi o ličnoj zaštitnoj opremi** („Službeni glasnik BiH”, broj 75/10) može se staviti na tržište Bosne i Hercegovine ili u upotrebu samo ako ne ugrožava zdravlje i sigurnost korisnika.

Tokom provedbe projekta izvršeno je 11 inspekcijskih kontrola koje su se zasnivale na provjeri označavanja proizvoda, uputstva i laboratorijskog ispitivanja uzoraka. Ukupno je kontrolisano 10 različitih modela sigurnosne / zaštitne obuće. Od ukupnog broja kontrolisanih proizvoda 3 modela sigurnosne / zaštitne obuće je bilo usklađeno sa Naredbom o ličnoj zaštitnoj opremi. Kod 7 modela (u količini od 3813 komada) sigurnosne / zaštitne obuće, utvrđene su najčešće sljedeće neusklađenosti:

- Nedovoljna otpornost zaštitne kapice.
- Nedovoljna otpornost na habanje podstave luba, sara i kragni.
- Nepotpuno označavanje proizvoda.
- Nisu kompletne obavezne informacije koje daje proizvođač uz proizvod.
- Nema naziva i adrese proizvođača.

Poslovni subjekti su dobrovoljno ili po nalogu inspekcijskih organa izvršili usklađivanje 4 modela (3028 komada) neusklađene sigurnosne / zaštitne obuće s odredbama propisanim Naredbom o ličnoj zaštitnoj opremi. Također, poslovni subjekti su dobrovoljno povukli sa tržišta 3 modela u količini od 785 komada (od povučene količine poslovni subjekti su uništili 532 komada).



ZATVORENE EKSPANZIONE POSUDE SA MEMBRANOM

Ekspanziona posuda je posuda koja ima ulogu da preuzme varijacije zapremine tečnosti usljed promjene temperature. Ekspanziona posuda je „zatvorena” ako tečnost koju preuzima nije u kontaktu sa bilo kojom drugom tečnošću ili gasom. Koriste se u zatvorenim sistemima centralnog grijanja, sistemima za snabdijevanje svježom vodom ili u solarnim sistemima za zagrijavanje vode.

SAVJETI PRILIKOM KUPOVINE

Prilikom kupovine ekspanzionih posuda najbitnije je odabrati odgovarajuću posudu za predviđenu namjenu, a poštujući preporuke stručnjaka. Pored toga potrebno je obratiti pažnju na sljedeće:

➤ **Da li se na proizvodu nalaze obavezne informacije?**

Na ekspanzionim posudama moraju biti trajno, vidljivo i čitko naznačene sljedeće oznake i informacije: znak usklađenosti, naziv i adresa proizvođača ili ovlaštenog zastupnika, godina proizvodnje, serijski broj, najveći dozvoljeni pritisak PS, zapremina posude V, najveća / najmanja dozvoljena radna temperatura TS i ispitni pritisak PT.

➤ **Da li je uputstvo za upotrebu priloženo uz proizvod?**

Uputstvo za upotrebu mora biti priloženo uz proizvod i napisano na jednom od jezika koji su u službenoj upotrebi u Bosni i Hercegovini. Ono mora da sadrži sve potrebne sigurnosne informacije u vezi sa montažom, stavljanjem u upotrebu, korištenjem i održavanjem.

➤ **Da li proizvod ima vidljivih sigurnosnih nedostataka?**

Na metalnim dijelovima ekspanzione posude koji za vrijeme normalnog rada dolaze u kontakt sa svježom vodom ne smije biti tragova korozije. Oni moraju biti izrađeni od materijala otpornih na koroziju ili adekvatno zaštićeni od korozije. Također, na vanjskim dijelovima posude ne smije biti značajnijih tragova korozije. Posude sa izmjenjivom membranom moraju imati otvor koji služi za zamjenu membrane i za potrebe unutrašnjeg pregleda.



REZULTATI NADZORA EKSPANZIONIH POSUDA

PRAVNI OSNOV

Zatvorene ekspanzione posude sa membranom se mogu staviti na tržište Bosne i Hercegovine samo ako ispunjavaju osnovne sigurnosne zahtjeve propisane **Naredbom o opremi pod pritiskom** („Službeni glasnik BiH”, broj 52/11).

Tokom provedbe projekta izvršeno je 11 inspekcijskih kontrola koje su se zasnivale na administrativnoj provjeri dokumentacije i oznaka na proizvodu, te vizuelnoj provjeri proizvoda. Kontrolisano je 9 modela zatvorenih ekspanzionih posuda sa membranom, od kojih je kod 6 utvrđena administrativna neusklađenost – uputstvo za upotrebu nije prevedeno na jedan od jezika koji su upotrebi u BiH, dok su ostala 3 modela bila usklađena sa Naredbom o opremi pod pritiskom. Poslovni subjekti su dobrovoljno uskladili svih 6 modela neusklađenih proizvoda u ukupnoj količini od 1127 komada.

BITUMENSKE TRAKE ZA HIDROIZOLACIJU



Bitumenske trake za hidroizolaciju zidova i podzemnih konstrukcija su tvornički napravljene savitljive trake od bitumenskih materijala ili kompozita koje se koriste na konstrukcijama zidova ili na ili ispod podova ili podnih ploča da se spriječi da tekuća voda, koja je pod hidrostatičkim pritiskom, prođe iz tla u unutrašnjost objekta ili iz jednog dijela konstrukcije u drugi.



BITUMENSKE TRAKE - STAVLJANJE NA TRŽIŠTE

Bitumenske hidroizolacije koje se stavljaju na tržište Bosne i Hercegovine moraju biti označene oznakom usklađenosti / usaglašenosti propisanom pravilnicima o označavanju građevinskih proizvoda („Službene novine FBiH“, broj 88/10 i „Službeni glasnik RS“, broj 93/12) ili standardima BAS EN 13969:2008, BAS EN 13969/A1:2008 i BAS EN 13707:2014 (na području entiteta Republika Srpska). Oznaka usklađenosti / usaglašenosti sadrži:

- Znak “E” u Federaciji Bosne i Hercegovine i bez oznake ili znak “CE” u Republici Srpskoj;
- Ime proizvođača;
- Sjedište proizvođača;
- Zadnja dva broja godine u kojoj je oznaka stavljena na proizvod;
- Evidencijski broj ovlaštenog lica / tijela za ocjenjivanje usklađenosti / usaglašenosti;
- Oznaka tehničke specifikacije građevinskog proizvoda - standard BAS EN 13969:2008, BAS EN 13969/A1:2008 ili BAS EN 13707:2014;
- Naziv građevinskog proizvoda;
- Proizvođačeva identifikacijska oznaka građevinskog proizvoda;
- Obavijest o svojstvima / karakteristikama građevinskog proizvoda.

Zakonima o građevinskim proizvodima u FBiH i u RS je propisano da proizvođač, ovlašteni zastupnik odnosno uvoznik građevinskog proizvoda mora prije stavljanja na tržište, odnosno upotrebe građevinskog proizvoda izraditi tehnička uputstva. Tehnička uputstva moraju slijediti svaki građevinski proizvod koji se isporučuje odnosno svako pojedinačno pakovanje. Tehnička uputstva moraju sadržavati podatke značajne za transport i upotrebu proizvoda, zatim mora biti naveden rok do kada se taj proizvod smije ugraditi, odnosno da taj rok nije ograničen. Uz pisani tekst, tehnička uputstva radi lakšeg razumijevanja mogu sadržavati nacрте i ilustracije. Sve informacije u tehničkom uputstvu moraju biti napisane na jednom od službenih jezika u Bosni i Hercegovini. Tehnička uputstva moraju sadržavati prepis izjave o usklađenosti. Proizvođač, ovlašteni zastupnik odnosno uvoznik građevinskog proizvoda je dužan da prije stavljanja građevinskog proizvoda na tržište osigura certifikat o usklađenosti i izjavu o usklađenosti.

REZULTATI NADZORA BITUMENSKIH TRAKA ZA HIDROIZOLACIJU

PRAVNI OSNOV

Bitumenske hidroizolacije odnosno bitumenske trake za zaštitu od vlage i vode iz tla i ojačane trake od bitumena za hidroizolaciju krovova se mogu staviti na tržište Bosne i Hercegovine ili u upotrebu samo ako ispunjavaju odredbe **Zakona o građevinskim proizvodima u FBiH** („Službene novine FBiH“, broj 78/09) i **Zakona o građevinskim proizvodima u RS** („Službeni glasnik RS“, broj 5/12).

Tokom provođenja projekta izvršeno je 12 inspekcijskih kontrola koje su se zasnivale na administrativnoj provjeri dokumentacije i vizuelnoj provjeri proizvoda. Ukupno je kontrolisano 7 različitih tipova hidroizolacionih traka. Od ukupnog broja kontrolisanih tipova 2 tipa su bila usklađena sa zakonima o građevinskim proizvodima, a kod 5 tipova je utvrđena neusklađenost. Utvrđene neusklađenosti su se sastojale u nepropisnom označavanju građevinskog proizvoda, nepostojanju znaka usklađenosti na proizvodu, proizvode nisu pratila tehnička uputstva, zatim nije bila priložena izjava o usklađenosti niti certifikat o usklađenosti. Poslovni subjekti su dobrovoljno ili po nalogu inspekcijskih organa izvršili usklađivanje 4 tipa (4097 rolni) neusklađenih hidroizolacionih traka sa odredbama propisanim zakonima o građevinskim proizvodima.



KERAMIČKE PLOČICE

Keramičke pločice su pločice napravljene od gline i / ili drugih neorganskih materijala. Primjenjuju se za unutrašnje i vanjsko oblaganje zidova i podova. Pločice se uobičajeno proizvode ekstrudiranjem (istiskivanjem) ili suhim presovanjem na sobnoj temperaturi, zatim sušenjem, pa pečenjem u pećima na temperaturi od 1050 - 1200° C, ali mogu biti proizvedene i na druge načine.



KERAMIČKE PLOČICE - STAVLJANJE NA TRŽIŠTE

Keramičke pločice koje se stavljaju na tržište Bosne i Hercegovine moraju biti označene oznakom usklađenosti / usaglašenosti propisanom pravilnicima o označavanju građevinskih proizvoda („Službene novine FBiH“, broj 88/10 i „Službeni glasnik RS“, broj 93/12) ili standardom BAS EN 14411:2013 (na području entiteta Republika Srpska). Oznaka usklađenosti / usaglašenosti sadrži:

- Znak “E” u Federaciji Bosne i Hercegovine i bez oznake ili znak “CE” u Republici Srpskoj;
- Ime proizvođača;
- Sjedište proizvođača;
- Zadnja dva broja godine u kojoj je oznaka stavljena na proizvod;
- Oznaka tehničke specifikacije građevinskog proizvoda - standard BAS EN 14411:2013;
- Naziv građevinskog proizvoda;
- Proizvođačeva identifikacijska oznaka građevinskog proizvoda;
- Obavijest o svojstvima / karakteristikama građevinskog proizvoda.

Zakonima o građevinskim proizvodima u FBiH i u RS je propisano da proizvođač, ovlašteni zastupnik odnosno uvoznik građevinskog proizvoda mora prije stavljanja na tržište, odnosno upotrebe građevinskog proizvoda izraditi tehnička uputstva. Tehnička uputstva moraju slijediti svaki građevinski proizvod koji se isporučuje odnosno svako pojedinačno pakovanje. Tehnička uputstva moraju sadržavati podatke značajne za transport i upotrebu proizvoda. Uz pisani tekst, tehnička uputstva radi lakšeg razumijevanja mogu sadržavati nacрте i ilustracije. Sve informacije u tehničkom uputstvu moraju biti napisane na jednom od službenih jezika u Bosni i Hercegovini. Tehnička uputstva moraju sadržavati prepis izjave o usklađenosti. Proizvođač, ovlašteni zastupnik odnosno uvoznik građevinskog proizvoda je dužan da prije stavljanja građevinskog proizvoda na tržište osigura izjavu o usklađenosti.

REZULTATI NADZORA KERAMIČKIH PLOČICA

PRAVNI OSNOV

Keramičke pločice se mogu staviti na tržište Bosne i Hercegovine ili u upotrebu samo ako ispunjavaju odredbe **Zakona o građevinskim proizvodima u FBiH** („Službene novine FBiH“, broj 78/09) i **Zakona o građevinskim proizvodima u RS** („Službeni glasnik RS“, broj 5/12).

Tokom provođenja projekta izvršeno je 17 inspekcijskih kontrola koje su se zasnivale na administrativnoj provjeri dokumentacije i vizuelnoj provjeri proizvoda. Ukupno je kontrolisano 14 različitih tipova keramičkih pločica. Od ukupnog broja kontrolisanih tipova, 4 tipa su bila usklađena sa zakonima o građevinskim proizvodima, a kod 10 tipova je utvrđena neusklađenost. Utvrđene neusklađenosti su se sastojale u nepropisnom označavanju građevinskog proizvoda, nepostojanju znaka usklađenosti na proizvodu, zatim proizvode nisu pratila tehnička uputstva i izjava o usklađenosti. Poslovni subjekti su dobrovoljno ili po nalogu inspekcijskih organa izvršili usklađivanje 10 tipova (36614 komada) neusklađenih keramičkih pločica sa odredbama propisanim zakonima o građevinskim proizvodima.

REAKTIVNI NADZOR U 2015. GODINI

Na osnovu dostupnih informacija o nesigurnim proizvodima u 2015. godini, Agencija za nadzor nad tržištem Bosne i Hercegovine je pokrenula ukupno 22 predmeta reaktivnog nadzora.

Od ukupnog broja pokrenutih predmeta, u 15 slučajeva je utvrđeno da su nesigurni proizvodi stavljeni na tržište Bosne i Hercegovine. Kao rezultat aktivnosti u okviru reaktivnog nadzora sa tržišta Bosne i Hercegovine je povučeno ukupno 6742 proizvoda, od čega su 54 proizvoda uništena. Izvršeno je usklađivanje 633 proizvoda i od potrošača je izvršen povrat 23 proizvoda.

PROIZVODI KONTROLISANI U OKVIRU REAKTIVNOG NADZORA

RB	Proizvod	Povučeno s tržišta (komada)	Povrat od potrošača (komada)	Uništeno (komada)	Izvršeno usklađivanje
1.	Baterije za laptop Lenovo	0	0	0	1
2.	Detektor ugljenmonoksida Commel	31	23	54	0
3.	Dječija stona lampa (12 modela proizvoda)	6305	0	0	0
4.	Dječiji bicikl Butterfly 16 Alu	0	0	0	3
5.	Dječiji bicikl Spike 12 BIC 7200	0	0	0	15
6.	Dječiji bicikl Spike 12 BIC 7215	0	0	0	20
7.	Dječije cipele Cupcake Couture	69	0	0	0
8.	Donji dio trenerke za dječake Beba Kids	0	0	0	166
9.	Donji dio trenerke za dječake Rang	0	0	0	84
10.	Dukserica za djevojčice RANG	0	0	0	180
11.	Krevet na sprat KRSP Jela	7	0	0	0
12.	Oprema na dječijem igralištu	0	0	0	1
13.	Prenosna kvarcna sobna grijalica	0	0	0	163
14.	Skijaške kacige Briko	283	0	0	0
15.	Stolica Malibu Zelena	47	0	0	0
UKUPNO		6742	23	54	633



SUMARNI REZULTATI NADZORA U 2015. GODINI

SUMARNI REZULTATI PROAKTIVNOG I REAKTIVNOG NADZORA SA PREDUZETIM MJERAMA


U 2015. godini je administrativno, vizuelno i / ili laboratorijski kontrolisano ukupno 176 modela proizvoda, od čega je 140 modela (69552 komada) bilo neusklađeno sa propisanim sigurnosnim zahtjevima.

Od ukupnog broja neusklađenih komada proizvoda poslovni subjekti su dobrovoljno ili po nalogu inspeksijskih organa izvršili usklađivanje 52544 komada proizvoda sa propisanim sigurnosnim zahtjevima. Sa tržišta BiH je povučeno i vraćeno od potrošača 17008 komada proizvoda od kojih je 8764 komada uništeno.

Ukupan broj neusklađenih proizvoda **69552**

Broj proizvoda kod kojih su otkonjene neusklađenosti **52544**



Broj povučenih proizvoda sa tržišta i vraćenih od potrošača **17008**



- Broj povučenih proizvoda sa tržišta i vraćenih od potrošača
- Broj uništenih proizvoda

GRUPE PROIZVODA SA OZBILJNIM RIZIKOM ZA POTROŠAČE

Tokom realizacije proaktivnog i reaktivnog nadzora u 2015. godini, ustanovljeno je da 69 modela nesigurnih proizvoda predstavlja ozbiljan rizik za potrošače, zbog neispunjavanja propisanih sigurnosnih zahtjeva.




SUMARNI REZULTATI NADZORA U 2015. GODINI




VRSTE RIZIKA

Kod 69 modela proizvoda sa ozbiljnim rizikom za potrošače utvrđene su sljedeće vrste rizika:



PORIJEKLO PROIZVODA SA OZBILJNIM RIZIKOM






LISTA PROIZVODA SA OZBILJNIM RIZIKOM

Rb.	Naziv proizvoda	Model / tip proizvoda	Zemlja porijekla	Vrsta rizika
1.	Prenosna dječija svjetiljka	Kuca DY 10006	Kina	Rizik od strujnog udara i opekotina
2.	Prenosna dječija svjetiljka	Koš. lopta DY 10007	Kina	Rizik od strujnog udara i opekotina
3.	Prenosna dječija svjetiljka	Plavi medo DY 10010	Kina	Rizik od strujnog udara i opekotina
4.	Prenosna dječija svjetiljka	Medo DY 10011	Kina	Rizik od strujnog udara i opekotina
5.	Prenosna dječija svjetiljka	Auto sa kucom DY 10013	Kina	Rizik od strujnog udara i opekotina
6.	Prenosna dječija svjetiljka	DY 10008	Kina	Rizik od strujnog udara i opekotina
7.	Prenosna dječija svjetiljka	Vinnie pooh 8012	Kina	Rizik od strujnog udara i opekotina
8.	Prenosna dječija svjetiljka	Vinnie Pooh 2064	Kina	Rizik od strujnog udara i opekotina
9.	Prenosna dječija svjetiljka	Panda 20113	Kina	Rizik od strujnog udara i opekotina
10.	Prenosna dječija svjetiljka	Puž 1301	Kina	Rizik od strujnog udara i opekotina
11.	Prenosna dječija svjetiljka	Zec 20123	Kina	Rizik od strujnog udara i opekotina
12.	Prenosna dječija svjetiljka	DY 10009	Kina	Rizik od strujnog udara i opekotina
13.	Električni uvijač za kosu	Nepoznat	Kina	Rizik od požara i povreda
14.	Električno kuhalo za vodu	Extra kuhalo	Kina	Rizik od požara i povreda
15.	Električno kuhalo za vodu	Extra kuhalo	BiH	Rizik od požara i povreda
16.	Električno kuhalo za vodu	Nepoznat	Turska	Rizik od požara i povreda
17.	Električni toster	Nikai, tip nepoznat	Kina	Rizik od požara i povreda
18.	Prenosna kvarcna sobna grijalica	Luxell, tip LX-2820 S	Turska	Rizik od požara i povreda
19.	Prenosna kvarcna sobna grijalica	Kumtel tip KS-2035	Turska	Rizik od požara i povreda
20.	Prenosna kvarcna sobna grijalica	Afrodita	Srbija	Rizik od požara i povreda
21.	Prenosna kvarcna sobna grijalica	Afrodita Klasik 3x1000W, (do 25.12.2015. godine)	Srbija	Rizik od strujnog udara i opekotina
22.	Baterije za laptop računare Lenovo	Edge 11, Edge 13, Edge 14, Edge 15, Edge 120, Edge 125, Edge 320, Edge 325, Edge 420, Edge 425, Edge 430, Edge 520, Edge 525, Edge 530, X200, X201, X200S, X201S, X220, X220T, X100E, X120E, X121E, X130E, X131E, T410, T420, T430, T510, T520, W510, W520, L412, L420/421, L512, L520	Japan	Rizik od požara i povreda
23.	Dječija lutka „Beauty and The Fashion Party“	YS1207	Kina	Hemijski rizik
24.	Dječija lutka „Super Girl“	Lot: 201302	Kina	Hemijski rizik
25.	Dječija lutka „Sofia Fashion Show“	FB42682	Kina	Hemijski rizik
26.	Dječija lutka „DEFA LUCY“	D.L. 8226	Kina	Hemijski rizik
27.	Dječija lutka - Lovely Play Set	Nepoznat	Kina	Hemijski rizik
28.	Dječija lutka „DOC McStuffins“	MKD836033	Kina	Hemijski rizik
29.	Dječija lutka „Surprise! Fashion everlasting friendship!“	NO 1-18381-V11A	Kina	Hemijski rizik
30.	Dječija lutka „Girl Fashion“	TRH20979	Kina	Hemijski rizik
31.	Dječija lutka „LOVELY BABY“	B5251	Kina	Hemijski rizik
32.	Dječija lutka „GIRL BARBIE“	ROIG FB01916	Kina	Hemijski rizik

LISTA PROIZVODA SA OZBILJNIM RIZIKOM



Rb.	Naziv proizvoda	Model/tip proizvoda	Zemlja porijekla	Vrsta rizika
33.	Vještačko voće grožđe	1636-1	Kina	Rizik od gušenja
34.	Dekoracija voće, kruška žuta 3/1	ANGEL DEL RIO	Kina	Rizik od gušenja
35.	Dekoracija voće, naranče	Nepoznat	Kina	Rizik od gušenja
36.	Dekoratívno voće (trešnjice)	S45634	Njemačka	Rizik od gušenja
37.	Svijeća u čaši	S76122	Kina	Rizik od gušenja
38.	Dječiji set za igranje - posuđe	OTG0846527	Kina	Rizik od gušenja
39.	Cvijetni aranžman mini stablo s bobicama	FC 120060	Nepoznato	Rizik od gušenja
40.	Svijeća u konzervi	S72487	Kina	Rizik od gušenja
41.	Vještačko grožđe, bijelo i crno	A-G0207	Kina	Rizik od gušenja
42.	Mirisne svijeće	Nepoznat	Kina	Rizik od gušenja
43.	Skejtboard	No Fear Snr 40	Kina	Rizik od povreda
44.	Skejtboard	MKA 091007	Kina	Rizik od povreda
45.	Skejtboard	HW31085/Ry3108	Kina	Rizik od povreda
46.	Skejtboard	Firefly, Spiral, Grafit	Kina	Rizik od povreda
47.	Skejtboard	NG20 8RY	Kina	Rizik od povreda
48.	Koturaljke Street Rock	GW-370 R	Kina	Rizik od povreda
49.	Koturaljke	ROIG YX-0106	Kina	Rizik od povreda
50.	Koturaljke	JinXin OB600003	Kina	Rizik od povreda
51.	Dječiji bicikl	Adria G12BA486	Kina	Rizik od povreda
52.	Dječiji bicikl	Bmx 12 plavi	Kina	Rizik od povreda
53.	Dječiji bicikl	MTB Good Bike 12 BMX	Kina	Rizik od povreda
54.	Dječiji bicikl	Toyue LDS-12	Kina	Rizik od povreda
55.	Dječiji bicikl	Tiger	Kina	Rizik od povreda
56.	Dječiji bicikl	Burner 12" SXH 1213	Kina	Rizik od povreda
57.	Dječiji bicikl	Robi Fld14-003 Airis	Kina	Rizik od povreda
58.	Mišići za plivanje Pool School Step3	56643EE	Kina	Rizik od utapanja
59.	Mišići za plivanje Intex Hello Kitty	56656EE	Kina	Rizik od utapanja
60.	Mišići za plivanje	Intex 59640EU 19 x 19 cm	Kina	Rizik od utapanja
61.	Mišići za plivanje	EM400 Art. 83102	Kina	Rizik od utapanja
62.	Zaštitna obuća	Panda Mistral 96939 S3 (do 2013. godine)	Italija	Rizik od povreda
63.	Zaštitna obuća	Lushunda A8055 AK SBP	Kina	Rizik od povreda
64.	Krevet na sprat KRSP Jela	Marka: Kiki Model: Jasen (do 17.12.2015.godine)	Srbija	Rizik od povreda
65.	Sklopiva stolica	Piccolo 211691	Kina	Rizik od povreda
66.	Stolica Malibu zelena	Nepoznat	Italija	Rizik od povreda
67.	Stolica Lara	HK-430	Turska	Rizik od povreda
68.	Dječije cipele	Cupcake Couture 1400511	Kina	Rizik od gušenja
69.	Detektor ugljenmonoksida	Commel 440-201	Kina	Rizik od gušenja



Agencija za nadzor nad tržištem Bosne i Hercegovine

Karađorđeva 8, 71123 Istočno Sarajevo

Tel.: 00 387 57 340 718 ■ Fax: 00 387 57 343 502 ■ E-mail: msa.info@annt.gov.ba
www.annt.gov.ba ■ www.facebook.com/ANNTBIH ■ www.twitter.com/ANNTBIH

ISSN 2303-5439



9 772303 543904